

**Ein gut newe Jar /  
den grossen Herrn in  
dieser Welt gescharckt:**

**Durch Niclas von  
Amsdorff.**

**Psal. II.**

So laßt euch nu weisen jr Könige/vnd laßt  
euch züchtigen jr Richter auff Erden.

Dienet dem **HEXVI** mit furcht / vnd  
fretet euch mit zittern.

Küßet den Son/das er nicht zürne/vnd jr  
vmbkomet auffm wege / Denn sein zorn wird  
bald anbrennen / Wer wol allen die auff in  
trawen.

**Coloff. II.**

Sethet zu / das euch niemand beraube  
durch die Philosophia vnd lose verführung /  
nach der Menschen satzungen / vnd nach der  
Welt satzungen/vnd nicht nach Christo.

**MMD. 1554.**



Dem Durchlauch-  
tigsten Hochgebornen Fürsten vnd  
Herrn / Herrn Johans Friderich dem  
Äldern / Hertzogen zu Sachsen vnd ge-  
bornem Churfürsten / Landgrauen  
in Düringen / vnd Marggrauen  
zu Meissen / meinem gnedig-  
sten Herrn.

**D**urchlauchtigster Hoch-  
geborner Churfürst / Got-  
tes gnad vnd Geist wünd-  
sche Ich alzeit E.Ch. f. G.  
in meinem teglichen Gebet / in vnd durch  
das erkentnis Ihesu Christi / vnsers lie-  
ben Herrn / Amen.

Gnedigster Herr / Ich hab an die  
Herrn in dieser Welt ein new jar gestalt/  
welchs ich vnter E.Ch. f. G. namen dar-  
umb hab lassen ausgehen / das Ich weis/  
das E. Ch. f. G. iren glauben an Ihesum  
Christum herrlich bekand haben. Auff das  
nu solch Christlich Bekentnis rein vnd  
A ij vnbe-

vnbesleckt bleibe/vnd vom Satan durch  
seine feurige Pfeil nicht besudelt werde/  
welche er izund scheussset vnd ausgensset/  
Nicht durch die Papisten oder Interimi-  
sten/des ich kein sorge habe/Denn sie sind  
zu grob / vnd Epicurisch der meherer  
teil / Sondern durch die Adiaphoristen/  
die vnter dem namen vnd schein Got-  
tes Worts/durch ire geschmückte rede/die  
Leute betriegen/das sie neben dem Euan-  
gelio den Antichrist anbeten / vnd seine  
Malzeichen an ire stirn/oder auff ire hen-  
de vnwissentlich/ehe sie es mercken vnd ge-  
war werden/empfahen vnd annemen/da  
durch Christus vnd sein Wort verleng-  
net wird.

Denn es ist nicht genug / das sie das  
Euangelium predigen vnd hören / Son-  
dern es ist auch von nöten / das sie sich für  
dem Antichrist wol fürsehen vnd hüten /  
Denn man kan nicht zweien Herrn zu-  
gleich dienen/oder mit beiden Kirchen ge-  
meinschaft haben. Derhalben wer mit  
des Papsts vnd seiner Messpaffen Kir-  
chen gemeinschaft hat / der kan mit dem  
Herrn Christo vnd seinem Euangelio  
kein



kein gemeinschaft haben / wenn er gleich  
das Euangelium alle stunde hörete vnd  
predigete / Denn er ist Christo feind / vnd  
hat sein wort verleugnet / oder je auff  
wenigst veracht / weil er dem Antichrist  
anhangt / oder in liebet / wie Christus im  
Euangelio klerlich sagt.

Darumb ist hoch von nöten / vnd je  
so not Reuelationem Antichristi zu predigen/  
als den Glauben selbst / Denn es ist so wol  
ein stück des Euangelij / als die predigt  
vom Glauben an Ihesum Christum vn-  
sern lieben HErrn. Dieweil nu die Leute  
sich für dem Römischen Antichrist hüten  
sollen vnd müssen / wo sie anders wollen  
selig werden / So mus man je den selben  
jnen zeigen vnd weisen.

Weil denn der Adiaphoristen lere  
vnd Confession der Reuelation Antichristi  
schweiget / vnd mit einem wort nicht geden-  
ckt / vnd doch gleichwol des Antichrists  
Malzeichen vnter einem neuen schein  
des Worts in der Leipziger ordnung  
zu halten gebent / So ist von nöten/  
das man sich für der Adiaphoristischen  
lere vnd Confession / als für dem Teuffel  
A. iij selbs

selbs hütte/vnd wol fürsehe / Auff das sie  
vns mit iren süßen listigen worten nicht  
beschleiche/nach betriege / dieselben Mal  
zeichen des Antichrists anzunehmen/damit  
vnd dadurch auch der Antichrist selbs an  
genommen vnd angebetet würde/ vnd eben  
durch solchen schein also heimlich vnd vn  
uersehens widerumb ins Bapstumb ge  
fürt würden/vnd das Euangelium war  
hafftig verlören / Vnangesehen das man  
viel dauon predigen/plaudern/vnd schrei  
ben würde.

Merumb fordert die höchste not/ das  
wir vns wol fürsehen/Denn solcher gro  
sser schein/vnd listiger betrug/ist noch nie  
fürhanden gewesen/das auch geleerte Leu  
te/so das Euangelium lieb haben / durch  
solchen schein vnd list bezaubert sind / das  
sie solche lere vnd Confession für Christi  
lich achten vnd halten.

Bitte derhalben vnterthemiglich E.  
Ch. f. G. wolten sich durch solchen schein  
vnd behende wort menschlicher vernunft  
vnd weisheit nicht bereden lassen / den A/  
diaphoristen in keinem stück zu trawen  
noch zu glauben / auch im wenigsten nicht  
vnd

vnd nicht vmb ein harbreit von **E.**  
**Ch. f. G.** glauben vnd Bekenntnis weich/  
en/sondern darinne / wie bisher gesche/  
hen / bestendiglich bleiben vnd beharren .

Denn wo man inen weicht / oder et/  
was im wenigsten vmb ein harbreit nach/  
gibt / so ist man schon von Christo gar  
abgefallen / Denn das wort vnd der

Glaube leidend nicht / das man

dem Antichrist etwas nachgebe /

sonderlich izund dieweil der

Antichrist reuelirt vnd geoff

senbart ist / Quia scrip

tum est . Nemo po

test duobus Do

minis seruire .

**Ein**

# Ein gut newe Jar/ den grossen Herrn in dieser Welt geschanckt.

Durch Niclas von Amsdorff.

**I**n dieser zeit pflegt einer  
dem andern das newe Jar zu  
schencken/vnd Ich bisher den  
grossen Herrn in dieser Welt ni-  
chts geschanckt habe. Dieweil  
aber mein zeit komen ist / das ich  
vielleicht bald von hinnen muss / Denn das 71.  
Jar hat mich vberfallen / Derhalben ich hoffe/  
Ihesus Christus mein lieber Gott vnd Verr/  
werde mich nu schier von hinnen zu sich in sein  
Reich nemen.

Auff das ich nu nicht vndanckbar erfun-  
den werde/für alle wolthat/so jr mir erzeigt vnd  
beweiset habt / So wil ich euch / ehe ich von  
hinnen scheide/ein seliges gutes newes Jar zur  
letze schencken vnd geben. Nicht ein gülden Klei-  
not mit edeln Steinen gezieret / denn ich hab  
Keins/So kan ich auch Keins Keuffen/noch beza-  
len/Sondern was ich hab/das wil ich euch ge-  
ben/das euch nützer vnd besser ist / wo jr selbst  
wolt / denn allerWelt ehre vnd gut/nemlich/  
diesen spruch Johannis Apoca. x.

Vnd

Vnd es ward mir ein Chor ge-  
geben/ einem Stecken gleich / vnd  
sprach : Stehe auff / vnd mis den  
Tempel Gottes/vnd den Altar/vnd  
die darinnen anbeten. Aber den in-  
nern Chor des Tempels wirff hin-  
aus / vnd mis in nicht / Denn er ist  
den Heiden gegeben.

**D**iesen tewren vnd werden Spruch/  
wie denn ein jedes Wort ist / so aus dem  
munde Gottes gehet/wie S. Paulus sa-  
get / wil ich euch grossen Herrn in dieser Welt  
jzund zur Letze/vnd newem Jar geschanckt ha-  
ben / Vnd bitte vntertheniglich / Ir wolt solch  
Newjar gnediglich vnd gutwillig annehmen.  
Nicht vmb meiner willen / sondern vmb ewer  
selbs willen / Euch thuts not / mir thuts ni-  
cht not / Denn jr bedürffts aus der massen  
wol/das jr diesen Spruch wol bedenckt vnd zu  
hertzen nemet/was er wil/saget vnd leret. Wolt  
Gott von Himel jr nemet es zu hertzen / vnd  
gebt acht drauff/ was er in sich helt/ vnd wie  
er solt verstanden werden.

Wil derhalben euch zum besten/ nach mei-  
nem geringen verstand / so viel mir Gott gnade  
verleihet/ein kleine kurtze Anzeigung thun/was  
dieser Spruch in sich hat vnd haben wil. Auff  
das doch etliche vnter euch vernemen vnd ver-  
stehen können/was da gesaget sey/ **Als** den  
Tempel Gottes / vnd wirff den innern Chor  
hinaus etc

**B**

**Denn**



Denn dieweil jr den Ketzer so feind seid /  
vnd sie mit solcher grosser begir austrotten vñ ver-  
tilgen wolt / So wird euch dieser Spruch Jo-  
hannis die rechten Ketzer / so billich zuuertreiben  
sind / Klarlich zeigen vnd weisen / welchs denn  
euch am höchsten von nöten ist / Auff das jr ni-  
cht feilet / noch anlaufft / vnd die fromen vñ  
schuldigen Christen / an stat der Ketzer / wie  
bisher geschehen / verlaget vnd vmbbringet /  
vnd die rechten Ketzer nicht allein schützet /  
handhabet / vnd verteidiget / sondern auch hoch  
erhebt vnd herrlich haltet .

Derhalben solt jr wissen / das dieser spruch  
Johannis . ( Wis den Tempel Gottes / vnd  
wirff den innern Chor hinaus ) ein Prophe-  
cey vnd weissagung ist / darinnen Johannes  
weissaget / das in der Christenheit zweierley Kir-  
chen sein werden / nemlich / der Tempel Gottes  
so gemessen wird / vnd der inner Chor / so hin-  
aus gestossen wird .

Der Tempel Gottes ist die Kirche / so mit  
eusserlichen Ceremonien / Tradition / Gesetzen /  
vnd Decreten gemessen wird / da durch jr ziel /  
masse / vnd weise gegeben vnd geboten wird /  
Wie sie singen / lesen / opffern / essen / trin-  
cken / vnd sich kleiden sol . Denn dazu ist des  
Papsts Kirche / durch seine Gebot vnd De-  
cret geordnet vnd gestiftet / das man allein solch  
eusserlich wesen vnd Kirchen geprenge vleisig  
vnd vnabbrüchlich halte / Wie denn alle Clö-  
ster / Stifte vnd Thumkirchen solchs anzei-  
gen vnd beweisen .

Welche allein vmb der Messe vnd irer Ceres-  
monien willen fundirt vnd gestiftet sind / als  
nemlich

nemlich/das man darinne Klinge vnd leutte/sin-  
ge vnd lese / orgele vnd pfeiffe / Messen vnd  
Seelmessen für Todte vnd Lebendige halte /  
das man sich so kleide / so esse / solche Rappen  
vnd Platten trage/das man Del/ Saltz/Was-  
ser/ Liecht/ Feyer / Schincken/Fladen/ Eier/  
Kraut vnd Würtze/ segene vnd weihe / igliches  
zu seiner zelt/ das Jar durch.

Auff solchen Ceremonien vñ eusserlichen Ges-  
prenge / welche Paulus Elementa mudi nennet/  
Gal.4 gehet vnd stehet/sitzet /vnd liget/ die Röm-  
mische Kirche/nemlich Wie man singen/lesen/  
essen / vnd sich kleiden sol / Welchs alles der  
Papist in seinen Tradition/ Decreten vnd Gese-  
tzen so streng vnd hart zuhalten befohlen vnd  
geboten / das sie mit gewalt des Schwerts  
vnd Bans/solchs zuhalten gedrungen vnd ge-  
zwungen sind/Vnd alle die es nicht halten/ Ja  
nur dawider reden oder mucken/als Ketzer ver-  
dampt vñ verbrent.Alleine darumb/ das sie sol-  
che seine Ceremonien vnd Kirchen geprenge/nit  
echt achten noch halten / welche er alle stracks  
wider Gottes wort/gebot vñ befehl in der Chris-  
tenheit/auffgericht vnd eingesatzt hat.

Denn Christus spricht/ das Reich Gottes/  
die Christliche Kirche/ Kompt nicht mit eusser-  
lichen Geberden/Es ist inwendig in euch.Vnd  
Paulus/ Das Reich Gottes ist nicht essen vnd  
trincken/sondern Gerechtigkeit/ friede vnd freu-  
de im heiligen Geiste.Vnd abermal 1. Corint.4.  
Das Reich Gottes stehet nicht in worten/ son-  
dern in Krafft/ das ist/ die Christenheit / oder  
Christliche Kirche/ stehet nicht in singen/ lesen/  
essen/trincken / kleiden so oder so / Sondern in  
rechtem glauben vñ rechter liebe. B ij Dies

Luc. xvi.  
Rom. xiii.

**D**Jerweil nu die Bepstische vnd Adiaphoristische Kirche mit solchen menschlichen Ceremonien/on Gottes Wort vñ befehl/ geordnet/ gestiftet/vnd abgemessen ist/Wie lange/wie offt/wie vnd wenn man Messe singen vñ lesen / was man essen/vnd wie man sich kleiden sol/ So ist gewis / das dieselben beide Kirchen / nemlich die Bepstische vnd Adiaphoristische / die abgemessene Kirche ist / da von der Text saget vnd spricht / Mis den Tempel Gottes/ vnd den Altar/vnd die darinnen anbeten.

**D**As ist nu die erste Kirche/da von der Engel saget/ darinne alles mus gemessen sein / der Tempel/die Messe/Altar. Personen/ vñ Kleider/ Denn ein jglichs hat sein eigen Tradition/ Gebot/vnd Gesetze/Wie mans eusserlich brauchen vnd halten sol/Auff das nicht ein jglicher (als D. Pfeffinger schreibt) mache/ wie er wil.

**D**arumb sind sie alle beide rechte Larnen Kirchen/mit einer schönen Farbe angestrichen / geschmückt/vnd gezieret/vnd ire Kirchen geprenge in hoher Ehre schweben/Darinne man in löstlichen Kleidern/Messe vñ Vesper singet vñ liest.

**D**a von der Prophet **W**dsas deutlich vnd klarlich geweissaget hat/ Cap. 7. Sie rufen mich nicht an von hertzen / sondern löhren auff iren Lagern / oder in iren Kirchen / Sie versamen sich vmb Korn vnd mosts willen/vnd sind mir vnghehorsam etc. Das ist auff Dendisch so viel gesaget/ Die Messthumpsaffen gehen zu Chor/singen/vnd lesen Messe/ halten Procession/vnd gehen mit Creutzen / vmb der Presentz willen/damit sie Gott nur reitzen vnd erzürnen/ das er mit der straffeilen mus / Denn sie thun alles vmb das Geitz willen/on Gottes Wort/Gebott

bott vnd befehl/ Auff das sie in irem Stande/  
bey irer Würde vnd Herrligkeit bleiben mögen.

**D**ie ander Kirche/da von Johannes  
hie saget ( Den innern Chor des Tem-  
pels wirff hinaus/vñ mis in nicht) Ist die  
wäre rechte Christliche Kirche/ welche von den  
Messern vnd Gesetzn gebern / dem Papst vnd  
seinen Messpaffen hinaus gestossen vnd ge-  
worffen wird/Dieselbe Kirche/spricht der En-  
gel zu Johannes/Mis nicht.

Denn die Christliche Kirche sol mit keinen  
Menschlichen Tradition oder Gesetzen ge-  
messen werden/Denn sie ist von Christo vnserm  
lieben **H**Errn gemessen/geordnet vnd gestiftet/  
wie sie bis an den Jüngsten tag sein vnd blei-  
ben sol. Derhalben sie kein Mensch noch En-  
gel endern oder bessern sol/ Sondern wir sollen  
vnd müssen sie bleiben lassen / wie sie Christus  
vnser lieber **H**Err geordnet/gestiftet/ vnd gesetzt  
hat/Denn sie ist auff's aller beste vnd feinste mit  
Lere vnd Ceremonien/durch die lieben Aposteln/  
aus Christus befehl/geordnet vnd gefasst/das  
sie keiner besserung noch enderung bedarff.

**D**enn Demosthenes vnd Cicero/ Juristen  
vnd Rhetores sind viel zu wenig vnd geringe  
dazu / das sie Christus Stifft vnd Ordnung  
endern oder bessern solten/Sie sollen schweigen  
vnd hören/die hand auff's maul legen/ vnd mit  
Saulo sprechen. Domine quid uis ut faciam?

**D**iese Kirche ist nu Gottes Reich/oder das  
Himmelreich/ die heilige Christenheit / die da ste-  
het im rechten glauben vnd rechter liebe. Wo nu  
rechter glaube vnd rechte liebe ist/ da ist Gottes  
Reich/das Himmelreich/ vnd die Christliche Kir-

che. Aber rechten Glauben vnd rechte liebe kan  
niemand haben/denn durchs Wort vnd pre-  
digt des heiligen Euangelij/welchs allein / vnd  
sonst nichts auff Erden/ rechten glauben vnd  
liebe leret/Denn beide glaube vnd liebe werden  
vom heiligen Geiſt durchs wort in vnſer hertzen  
gegoffen.

Es. lvi.

Wo nu Gottes wort geprediget wird / da iſt  
gewiſſe glaube vnd liebe/Denn Gottes wort/  
ſpricht der Prophet/wird nicht vergeblich gepre-  
digt. Wo aber Glaub vnd liebe iſt/da iſt gewiſſe  
die rechte Kirche/die von Papiſten vnd Ablas-  
phoriſten hinaus geſtoſſen vnd verworffen wird.  
Wo aber Gottes wort nicht rein geprediget  
wird/da iſt weder Kirche/Glaube/noch liebe/  
Denn on Gottes wort kan kein Glaube ſein/  
Wie der glaube Gottes wort ſoddert/alſo ſod-  
dert das wort den Glauben/Denn wie Glaus-  
ben on wort falſch vnd triegerey iſt/Alſo iſt  
Wort on Glauben heucheley vnd Abgötterey/  
Derhalben gehören ſie zuſammen/alſo/das eins  
on das ander nicht ſein kan.

Darumb ſol dieſe verworffen vnd ausge-  
ſtoſſen Kirche/wie geſagt/mit Geſetzen vnd Ce-  
rimonien menſchlicher Tradition nicht gemeſ-  
ſen/gefaſſt noch gebunden werden / wie Chri-  
ſtus vnſer lieber Herr ſagt / Das Himelreich  
kompt nicht mit euſſerlichen geberden/ſondern  
iſt inwendig in euch/das iſt/die Chriſtliche Kir-  
che ſtehet vnd gehet allein darinne vnd in dem/  
was wir im hertzen haben/nemlich/das wir  
recht glauben vnd lieben.

Denn Klingen/ ſingen/Vesper/Meſſe vnd  
Vigilien halten/ ſind nicht der Chriſtlichen Kir-  
chen



ehen opffer vnd werck / sondern Gott glauben  
vnd lieben / sind die rechten opffer der Christ-  
lichen Kirchen. Wie Christus vnser lieber Herr  
spricht Matth. 23. Es werden nicht alle / die zu  
mir sagen / Herr / Herr / in das Himelreich  
kommen / Sondern die den willen thun meines  
Vaters im Himel.

Des Vaters wille aber ist nicht Messe/  
Vigilien / vnd Vesper singen / Processiones /  
Creutzgehe vnd andere Ceremonien halten /  
welchs Gott nicht geboten noch befohlen hat/  
sondern Gott trawen vnd glauben / in anrufen  
vnd von gantzem hertzen lieben / Welchs Gott  
gar thewer befohlen vnd geboten hat. Denn die  
Gottlosen können auch Vesper singen vnd Mes-  
se halten / Aber Gott lieben vnd fürchten kan  
kein gottloser noch falscher Christen thun.

Vnd was wollen wir viel von den losen  
Ceremonien sagen / die das hertz einnehmen / vnd  
die Menschen von Gottes wort abführen / den  
Glauben ausleschen vnd vertilgen. Spricht  
doch S. Paulus / das Reich Gottes stehet nicht  
in worten / das man viel dauon schwatzet vnd  
prediget / sondern in der Krafft / das ist / im Glau-  
ben vnd in der liebe.

Denn von Gott vnd seinem Wort viel re-  
den vnd predigen / *perluasibilibus humane sapien-  
tiae uerbis*, können auch die falschen Christen/  
sonderlich das lose Gesinde / Juristen / Orato-  
res vnd Rhetores. Aber Gott vnd seinem Wort  
allein glauben / vnd in vber alle ding lieben / vnd  
den Nächstten / als sich selbst / kan niemand  
thun / denn die rechten waren Christen. In  
diesen wercken vnd thaten stehet die Christ-  
liche

liche Kirche/ Gottes Reich/ vñ die Christenheit/  
nicht in eusserlichen Ceremonien/ als singen/  
lesen/ essen/ reden/ vñ kleiden/ Welchs alles  
von Jüden herkommen ist/ on Gottes wort/ Bes  
bott vñ befehl.

Derhalben die arme verworffen vñ aus  
gestossen Kirche/ nicht anders fürnimpt noch  
thut/ denn das sie Gottes wort/ vñ die heil  
gen Sacrament/ so Christus vnser lieber D<sup>er</sup>r  
eingesetzt hat/ leret/ prediget/ vñ drüber treus  
lich helt/ vñ kein andere menschliche Ceremo  
nien zulest/ noch annimpt/ Sondern allein die  
Christus vnser lieber D<sup>er</sup>r eingesetzt/ vñ zu  
halten befohlen vñ geboten hat/ als die Täu  
ffe/ des D<sup>er</sup>rn Abendmal/ hoc est Communio  
nem populi, da mit man on Spectakel vñ Kir  
chen geprenge Gott loben/ dancken vñ preisen/  
seine Wunderthat jederman predigen vñ ver  
kündigen sol.

Diese Kirche bringet vñ zwinget nie  
mand zu irer lere vñ Ceremoniē/ sondern durch  
ir predigen vñ vermanen reitzet vñ locket sie  
jederman/ dieselbe anzunemen/ vñ lessets ein  
iglichen frey/ ob ers annemen wil/ oder nicht/  
veriaget vñ tödtet niemand darumb/ Wer ni  
cht wil/ den lesset sie fahren/ gehet von im vñ  
schüttelt den staub von iren füßen/ wie Christus  
vnser lieber D<sup>er</sup>r ir befohlen vñ geboten hat.

Die jenigen aber/ so die lere angenommen  
haben/ vñ Christen sein wollen/ vñ doch  
gleichwol sündigen/ vermanet/ warnet/ vñ  
straffet sie/ das sie sich bekeren vñ bessern sol  
len/ Vñ wo sie nicht wollen/ so thut sie die sel  
bigen in Bann/ auff das sie schamrot werden/  
vñ sich bekeren.

Das

Das sie aber jemand solt verlagen oder töd-  
ten/das thut sie nicht/hats auch nie gethan von  
anfang her/thuts auch nimmermehr/wie das  
nicht allein Christus vnsers lieben Herrn wort  
vnd Gebot /sondern auch der heiligen Apostel  
that vnd Exempel klerlich zeugen vñ ausweisen.

Darumb gebüret der Christlichen Kirchen  
niemand zu verlagen noch zu tödten/sondern es  
gehört vnd gebürt der gemessenen vnd Caruena-  
Kirchen/das sie solchs thue vnd ausrichte / wie  
sie denn thut vnd gethan hat / stracks wider  
Christus wort/befehl vnd Gebot.

Gleich wie die Jüden vmb irer Opffer vñ Ce-  
remonien willen Christum vnd die Aposteln töd-  
ten/Also tödtet itzund der Papsst vñ seine Wes-  
paffen/vmb seiner Aufsetze willen/die rechten  
Christen / wie sie solchs an Dussiten vnd itze  
an Lutherischen reichlich beweiset haben. Aber  
die rechte Kirche bannet noch tödtet niemand/  
vmb der Eere vnd glaubens willen/Denn was  
gehet die Kirche die an/so draussen sind?

Als aber der Engel weiter saget/Der  
Dinner Chor (das ist/die rechte Christliche  
Kirche)ist den Weiden gegeben/das ist/  
die rechte Kirche kompt von Jüden auff die  
Weiden. Denn die Synagog/ die Jüden/ sind  
nicht mehr Gottes Volck / wie sie gewest sind/  
sondern die Weiden sind durch den Glauben  
Gottes Volck vnd die rechte Kirche worden.

Also auch die Römische Kirche ist nicht  
mehr die Christliche Kirche/denn sie ist/wie die  
Jüden/vom Wort vnd Glauben abgefallen/  
vnd ist ein gemessener Tempel worden/der mit

Titel Ceremonien / vnd menschlichen Tradition  
gefasst vnd gemessen ist.

Aber die Lutherischen / so Gotteswort vnd  
Glauben haben / sind die rechte ware Christliche  
Kirche / die von der gemessenen Larnenkirche zu  
Rom / hinaus gestossen vnd verworffen ist.

Welchs also durch der Jüden fall / vnd  
der Heiden eingang figurirt vnd bedeutet ist /  
Denn alle Geschichte der Jüden (sagt S. Paulus)  
sind ein Figur der künftigen geschichte / so  
in der Christlichen Kirchen geschehen / vnd jr  
widerfahren sollen.

Das ist nu die meinung des Engels / da Er  
zu Johanne spricht. Wis den innern Chor des  
Tempels nicht / denn er ist den Heiden gegeben.  
Denn die Christliche Kirche / sol von Menschen  
en vngemessen vnd vngefasset bleiben / welche  
Christus vnser lieber Herr allein mit seinem  
Wort / Gebot / vnd Befehl gemessen vnd gefas-  
set hat.

Aber des Papsts Larnenkirche / die Stö-  
sserin / sol von den Menschen mit eusserlichen  
Ceremonien vnd Kirchen geprenge / so von Jü-  
den vnd Heiden genommen sind / gemessen vnd  
gefasst werden / wie der Engel hie sagt / Stehe /  
vnd mis den Tempel Gottes / vnd den Altar /  
Aber den innern Chor stoss hinaus. Diese  
Prophecey hat Rom reichlich erfüllet / Gott ge-  
be das alles was diesen worten folget / auch  
bald geschehe / vnd erfüllet werde / Amen.

Diesen Spruch wil ich euch lieben  
Herrn zum neuen Jar vnd zur Letzte ge-  
schanckt haben / möget derhalb wol zuse-  
hen / in welcher Kirche jr sein vnd bleiben wolt /  
vnd

on  
nd  
be  
zu  
b  
y  
o

vnd welche jr handhaben vnd schützen wolt/  
Denn es gilt euch/vnd nicht vns/ Es gilt euch  
den ewigen Tod / oder ewiges Leben / darnach  
möget jr euch richten/ Sehet euch wol für/das  
jr die rechte Kirche treffet/ vnd jr nicht feilet/ Ir  
habet die wahl / möget euch keren vnd wenden  
zu welcher jr wolt. Lieben Herrn es ist nicht  
schertz / es ist grosser ernst des göttlichen Ge-  
richts/ Darumb lasset euch nicht betriegen noch  
verführen/ Sehet auch wol zu/das jr euch selbst  
nicht betrieget noch verführet.

In Summa/ gebet achtung darauff/ was jr  
glaubet vnd thut/auff das jr euch nicht wendet  
noch wancket / sondern sicher vnd gewiss seiet/  
welchs die rechte Kirche ist / vnd bey welcher jr  
bleiben wolt / Ob jr bey der Kirchen / welche  
mit Besetzen/ Ceremonien vñ menschlicher Tra-  
dition gefasset vnd gemessen wird / so in ehren  
vnd gewalt schwebet/ vnd alle die jenigen / die  
ire Ceremonien mit Kirchengeprenge nicht wol-  
len annemen/ verdampft/ verfolget/ vnd tödtet /  
Oder ob jr bey dem innern Thor / so hin auß  
gestossen vnd verworffen wird/ vnd mit keinen  
Ceremonien oder menschlichen Tradition ge-  
messen/ noch gefasset ist / bleiben wolt? Wel-  
che nu euch vnter den beiden gefellt / die möget  
jr annemen/ dieselbe handhaben vnd schützen.

Vnd auff das jr euch selbst nicht betrieget/  
noch von andern betriegen vnd verführen lasset/  
So wil ich euch meinen Rath/ so es euch anders  
angenehm ist/ treulich mittheilen / vnd bitte gantz  
vntertheniglich/ die weils euch zum besten ge-  
schicht/ jr wölet es nicht verachten/ sondern mit  
vleis selbst bey euch in ewrem hertzen bedencken



was recht/billich/vnd Christlich sey/vnd diese  
Sache auff ewre Kethe nicht stellen/noch euch  
auff sie verlassen/Denn es sind Leute on Got-  
tes Wort/mit menschlicher weisheit begabet  
vnd begnadet / welche fur Gott in dieser Sa-  
cheder Religion ein lauter Thorheit ist / Son-  
dern sehet selbs drauff / es gilt euch/ ewrer Ke-  
the weisheit wird euch an jenem Tage nicht  
entschuldigen.

Werdet jr nu meinen Rath annehmen vnd fol-  
gen/so folget jr Gott vnd seinem Wort/welchs  
euch nicht betriegen / sondern den rechten weg  
lernen/zeigen/vnd weisen wird/dem selben folget  
vnd nemet in an /Wo es euch rewet/so spricht  
denn/das ich euch betrogen habe / So wil ich  
denn euch den schaden legen / vnd dazu ewer  
straff gedultiglich tragen vnd leiden.

Nu jr wisset / das nicht allein Gottes / son-  
dern auch das Römische vnd Weidnische Recht  
niemand verdampt/er sey denn zuuor gehört vñ  
vberwunden/Solchem Recht soltet jr als fro-  
me Richter billich folgen / wie jr schuldig vnd  
pflichtig seid/Wie jr aber solchs mit vns Luth-  
rischen gehalten habt/das wißt jr am besten.A-  
ber ich wil danon hie nicht sagen/Denn ich hab  
mit in diesem Büchlein fürgenomen euch zu  
raten vnd helffen / nicht zu straffen noch zu  
schelten.

**S**o ist nu das mein trewer rath / Diweill die  
gemessene Kirche des Papsts / vns Luth-  
rischen nicht allein anklagt / sondern auch  
hinaus gestossen/vnd als Ketzer vnuerhört vnd  
vnnberwunden verworffen vnd verdampt hat/  
Das

Das jr vns doch / als Wenppter des Römischen  
Reichs/woltet verhören/vnd sie nicht allein sa-  
gen / sondern auch beweisen / lassen / das wir  
Ketzer sind / Auch aus der Schrifft anzeigen/  
in welchem Articken des Christlichen glaubens  
wir irren vnd feilen . Wenn sie das thun/ so  
darffs Keins Mandats noch Gebots / sondern  
wir wollen von vns selbs gern vnd willig da-  
von abstehen/vnd widerruffen/denn wir wollē/  
ob Gott wil/kein irthumb/noch Ketzerrey leren/  
glenben noch predigen/viel weniger verteidigē.

Wenn sie nu solchs beweiset / vnd auff vns  
mit Gottes wort aus der Schrifft gebracht  
haben/vnd wir dauon nicht abstehen/Als denn  
saret fort/vnd handelt mit vns/ als sichs mit  
Ketzeren gebürt/Vnd ich sage für mich/das ich  
Keiner gnade begere / denn die gemeine Gnade/  
das man vns kein gewalt noch vnrecht thue.

Wo sie aber aus der heiligen Schrifft ni-  
cht anzeigen oder beweisen können / das wir  
Ketzer sind/ oder in einigem Artickel des glau-  
bens irren / So woltet euch bedencken vnd wol  
fürsehen / das jr die vnschuldigen nicht verfol-  
get/verdampft/noch tödtet/viel weniger vberzie-  
het vnd bekriegeret.

Wo jr aber solches verachten vnd in ewern  
thun/wie bisher geschehn/fort fahren werdet/  
So solt jr wissen/das jr niemand mehr schadet/  
denn euch selbs/ wie jr / leider zu seiner zeit / die  
weil irs jtz nicht glenbet / mit ewrem ewigen  
schaden erfahren werdet.

Als aber der Papst mit seinen Mess-  
paffen fürgibt / Es sey vnser lere vorhin im

Concilio zu Costnitz verhort vnd verdampt /  
Darumb sey nicht von nöten/das man sie noch  
ein mal verhöre/ oder in eim Concilio handele.

Darauff sage ich Kürzlich / das der Papp  
vnd sein Gesinde euch Herrn betriegen. Denn  
Johannes Duss ist nie verhört/habē auch kein  
Einrede noch Antwort von im hören/ viel weni-  
ger annemen/wollen/Sondern habē in schlecht  
fürföhren lassen / mit eim grossen tumult vnd  
geschrey als einen Ketzer verdampt / Wie die  
Historia solchs Klerlich anzeigt vñ ausweist.

3<sup>o</sup> dem/so hat S. Joannes Duss dieser  
vnsere Lere nie gedacht/nach mit eim wort ange-  
rürt / Sie ist auch in keinem Concilio gehan-  
delt / viel weniger dawider etwas decidirt oder  
definiert worden / Ja es ist diese vnsere Lere vnd  
Sache / vor Doctor Martinus zeit/ heiliger ge-  
dechnis / kein Menschen im Papstumb in  
sinn komen. Derhalben betriegen sie Keiser/Rö-  
nige / vnd Fürsten / wenn die Pfaffen vnd ire  
Juristen sagen/diese Sache sey vorhın im Con-  
cilio verhört vnd verdampt.

Denn es sind zween Artickel/ darauff die  
gantze Sache stehet / welche für Doctor Mar-  
tinus Luthers zeit / heiliger gedechtnis / nie er-  
fahren/nach erhört sind / viel weniger gehandelt  
vnd beratschlaget. Als nemlich der erste / Die  
Messe ist kein Gottesdienst / sondern für Gott  
ein Grewel vnd Abgötterey/ da mit man Gott  
nur erbittert vnd zu zorn reizet.

Der ander Artickel. Der Papp ist der rechte  
ware Antichrist/dauon die Schrifft weissaget  
vnd verkündiget/Vnd der Römische hoff(wenn  
er gleich

er gleich nach laut des geistlichen Rechts reformirt were ) ist des Antichristis Reich vnd Regiment. Da von Johannes Duss nicht ein wort geschrieben noch geprediget/sondern hat allein des Papsis vnd seiner Pfaffen geitz/hoffart/vnd vnzucht angegriffen vnd gestrafft/Aber der Messen vnd des Papsis Regiment / in geistlichem Recht verfaisset/hat er nicht gedacht.

Die vnd da von were von nöten in ein Concilio zu handeln / vnd ratschlahen (nicht das wirs bedürffen / so Gottes wort für vns haben / vnd nicht ein har breit/durch Gottes gnade/da von gedenccken zuweichen ) Würde sichs den finden/das die Messe ein Christlicher Gottesdienst were/welchs nicht che geschehen wird/Christus stimme denn zu vor mit Belial vber ein / Drumb auch D. W. heiliger gedecknis / die Pepsische Messe als ein lesterlichen Brewel vñ Abgötterey verworffen hat/vñ solchs aus göttlicher Schrift gewaltiglich erweist/derhalb auch als ein erticht menschen werck ab geschafft/Dagegen an stat derselbigen Communionem populi, nach Christus vnsern lieben Herrn einsetzung vnd befehl angericht.

Zu dem hat er auch mit starckem gewissen Grund/aus Gottes wort/angezeigt vnd ersritten/Das der Paps mit seiner Lere vnd Regiment dem heiligen Euangelio / vnd Christus Reich/nicht gemes/sondern zum höchsten entgegen vnd zuwider ist. Denn die Schrift nennet Christum / Doctorem iusticie, sein Reich / regnum gratia, & ueritatis Psal. 89. 117. vnd sein Lere uerbum pacis, uitae, salutis &c. Dagegen des Antichristis

17  
Christis reich/nennet sie ein Reich der sünden/der  
zorns/der lügen/des verderbens etc. vnd schre-  
leren/Doctrinas dæmoniornm 1.Timo.4.

Derhalben sehe ich für das beste an/das  
man danon in der zeit abstehe vnd weiche / da  
Gottes zorn vnd straffe angehe. Denn wenn  
die zeit vnd stunde des zorns komen vnd ange-  
hen wird/so ist's zu lange gehart/vnd wird als  
denn nichts helffen in himel/noch auff erden.

Denn es sind nicht mehrlein noch Fabeln  
da von Johannes hie saget/Wis den Tempel  
Gottes/vnd stos den innern Chor hinaus/denn  
er ist den Weiden gegeben ( das ist ) Die rechte  
Kirche ist nicht bey den/die den namen vnd Titel  
der Kirchen haben/sondern bey den/die Gottes  
wort / das heilig Euangelium hören vnd  
glauben/vnangesehen/das sie on  
Titel / namen vnd Regiment  
der Kirchen sind.

Gedruckt zu Thena/durch Christi-  
an Rödinger.